

## امام حسن عسکری (ع)

اسلامی معرفت و عقیده‌لردن دفاع ائله‌ماق و اونلاری فکر اوغرولاریندان و تحریفدن ساخلاماق اسلام بؤیوک‌لری و عالم‌لرینین مهم وظیفه‌لریندن ساییلیر.



اسلامی معرفت و عقیده‌لردن دفاع ائله‌ماق و اونلاری فکر اوغرولاریندان و تحریفدن ساخلاماق اسلام بؤیوک‌لری و عالم‌لرینین مهم وظیفه‌لریندن ساییلیر.

امام‌لارین (ع) چوخ یوخاری درجه‌ده اولان سیره‌لری‌نین مختلف ابعادی وار. عقیده مرز‌لرینده مدافعه ائله‌ماق اونلاردان بیریدیر. اونلار بو یولدا چوخلو چالیشدی‌لار و حتی لاپ چتین شرایطده، تحریفچیلرین قاباغیندا دایانیب شیعه عالم‌لرینه‌ده بو جریانین قاباغیندا دایانماغا تأکید بویورولار.

اما باقر (ع) بویورور: بیزه منسوب اولان عالم‌لر، شیطان و اونون قوشونلاری قاباغیندا صف چکن مبارزلری کیمیدیلر کی مدافعه‌سیز شیعه‌لری اونلاردان ساخلاییلار. بیلین کی او شیعه عالم‌لرین ارزشی کافرلر قوشونو قاباغیندا دایانان مبارزلردن مینر دفعه یوخاریدیر. چونکی شیعه عالم‌لری اسلام عقیده‌سی و بیزیم دوستلاریمیزین دینلری‌نین مدافعه ائله‌ینلریدیلر. بیر حالداکی مجاهدلر فقط جغرافی مرز‌لری ساخلاییلار.

امام حسن عسکری (ع) چوخ چتین شرایطده اسلام عقیده‌لریندن تحریفچیلر و عقیده اوغرولاری قاباغیندا دایاندیلار و ایستر آتاسی دؤرونده و ایستر اؤز آلتی ایلیق امام‌لری زمانیندا (254-جو ایلدن 26-جی ایله قدر) طاغوت قاباغیندا دایانماقدان علاوه، همیشه اسلام آدینا باش قوزایان فرقه‌لرین قاباغیندا مبارزه ائله‌دیلر.

اسحاق کندی اوزمانین اسلام و قرآن مخالف‌لریندن بیریدی و جماعت ایچینه فیلسوف و عالم کیمی تانیمیش ایدی. او اسلامینا مخالفتینی اورا چاتدیردی کی قرآنین ضدینه بیر کتاب یازماق قرارینا گلدی. او اؤز گمانینا او کتابدا قرآنین تناقض‌لرینی یازاجاق ایدی.

امام حسن عسکری (ع) بو مسأله‌نی بیلندن سونرا، اسحاق کندی‌نین شاگردلریندن اولان بیر شیعه‌نی چاغیریب اونا اسحاقین نجه قاباغینی آلمایا اؤرگتدی. امام بو ایشده اسحاقا کؤمک ائله‌ماغینی و اونان مأنوس اولاندان سونرا بو سؤزو سوروشماغی تاپیشیردی: قرآنین دئیینه (الله) سنه دنسه کی «منیم قرآن ایلریندن نظرده توتدوغوم سن گمان ائله‌دیغین کیمی دئییل بلکه من آیری بیر شئی نظرده توتوموشام». اوندان نه دئیرسن؟

بو شیعه امام امرینه مطابق اسحاق کندی‌نین یانینا گئدیپ بیر مدت اونا کؤمک ائله‌دی. اونان تماماً مأنوس اولاندان سونرا مناسب فرصته اونا دئدی: اوستادا! اول بیلر الله سن بیلدیغین معنادان آیری معنا اراده ائله‌میش اولار؟

کندی جواب وئردی: بلی بو مسأله‌نین امکانی وار. اولاد بیلر الله بیزیم آلدیغیمیز ظاهری معنادان ساوایی معنا اراده ائله‌میش اولسون. آما بو سؤز چوخ درین سؤز اولدو اونو سن اوزون دئمیش اولماغین چوخ بعیددیر دئ گؤروم بو سؤزو سنه کیم اؤرگدیب؟

شاگرد جواب وئردی: «بو سؤز امام حسن عسکری‌دندیر (ع)».

اسحاقی بونو ائشیدندن سونرا دئدی: «بو مسأله‌لر نبوت خاندانیندن غیرسیندن ائشیدیلیمز». سونرا قرآن تاقصی باره‌سینده یازدیقلاری‌نین هامیسینی یاندریدی.

احمد بن هلال آدیندا بیر شخص ظاهر‌سازلیق و یاغلی دیلی اینن شیعه‌لرین عقیده‌لرینه حمله ائلدی و صوفی‌چیلیغینان جماعتین عقیده‌لرین سوستالیدیپ ضعیف‌لیدی. شیعه‌لرین بیر عده‌سی اونو دوز و مؤمن آدم گؤرستماق ایستیدیلر. دئییدیلر او 54 دفعه آفاق‌لین بیت الله طیارینه گئدیپ. آما امام حسن عسکری (ع) چوخ قاطعانه عراقداکی نماینده‌لرینه اونون یالانچی اولدوغونو یازدی و تاپیشیردی کی اوندان اوزاق اولسونلار.

یننه بیر عده واسطه اولدولار کی امامین اونون باره‌ده اولان نظرنی دئییشسینلر آما امام یازدی: «احمد بن هلال –الله اونا باغیشلاماسین- باره‌ده اولان امریمیز سیزه چاتدی. الله اونون گناه‌لارینی و اشتباه‌لارینی باغیشلاماز. او بیزیم رضایتیمیزی آلمادان بیزیم ایشلرده دخالت ائدیپ و اؤز نفسانی هوس‌لرینه مطابق رفتار ائدیپ. الله اونا جهنمه آپاراجاق. بیز گؤزلریک کی الله بیزیم نفرین سایه‌سینده اونون عمرنو قیسا ائله‌سین».

امام حسن عسکری‌نین (ع) زندگانلیغی

ربیع الاولین سککیزی اون بیرینجی امام، امام حسن عسکری‌نین (ع) شهادت گونودور. او حضرت هجری قمری ایللی ربیع الثانی‌نین سککیزینده مدینه شهرینده دنیا یا گلدی.

او حضرت 22 یاشی اولاندا متوکل، منتصر، مستعین، معتز، مهتدی و معتمد عباسی کیمی ظالم خلیفه‌لر دؤرونده اماملیغا چاتدی. بو دؤرده عباسی خلیفه‌لری او حضرته اولان ظلم‌لرینی حد‌بندن آشیرمیشدی‌لار. چونکی مختلف روایتلره گؤره امام حسن عسکری‌نین (ع) اوغلو امام زمانین (عج) وارلیغیندان قورخوردولار و اونا گؤره او حضرتی نظارتده ساخلامیشدی‌لار و اؤز خلافتلری‌نین بقسی اوچون او حضرتی حبسه سالمیشدی‌لار.

آما امام (ع) مختلف یول‌لارینان جماعت اینن ارتباطدا اولوردو و بالاسی امام زمانین (ع) اماملیغینی اونلارا بشارت وئردی. معتمد عباسی امام حسن عسکری‌نین (ع) معنوی نفوذوندا قورخدوغونا گؤره او حضرتی 260 هجری قمری ایلین ربیع الاولین سککیزینده مسموم ائله‌یب شهادته چاتدیردی. او حضرتین مطهر مزاری سامراء شهرینده کرامتلی آتاسی‌نین مزاری‌نین کناریندا دیر.